

Na osnovu člana 41. stav (1) tačke c) Ustava Srednjobosanskog kantona („Službene novine Srednjobosanskog kantona“, broj:1/97, 5/97, 6/97, 2/98, 7/98-ispravka teksta, 8/98, 10/2000, 8/03, 2/04, i 14/04) i člana 20. Zakona o Agenciji za privatizaciju (Službene novine Federacije Bosne i Hercegovine broj: 18/96, 2/02 i 110/12), Skupština Srednjobosanskog kantona na _____ od _____ 2024.godine, donosi

NACRT

ZAKON

O AGENCIJI ZA PRIVATIZACIJU I JAVNO - PRIVATNOM PARTNERSTVU

DIO PRVI

I. OPĆE ODREDBE, PRAVNI POLOŽAJ, SJEDIŠTE I POČETAK RADA AGENCIJE

Član 1.

(Osnivanje)

Ovim zakonom osniva se Agencija za privatizaciju i Javno-privatno partnerstvo (u daljem tekstu: Agencija), utvrđuje se njen pravni položaj, sjedište, djelatnost i nadležnost, odgovornost i obaveze, upravljanje, rukovođenje i finansiranje.

Član 2.

(Pravni položaj)

(1) Agencija ima svojstvo pravnog lica.

(2) Agencija je specijalizovana organizacija Srednjobosanskog kantona. (u daljem tekstu: Kanton).

Član 3.

(Sjedište)

Sjedište Agencije je u općini Travnik.

Član 4.

(Početak rada)

Agencija počinje sa radom danom imenovanja direktora i izvršnog direktora za finansije, odnosno vršilaca dužnosti.

DIO DRUGI

II. DJELATNOST I NADLEŽNOST AGENCIJE

Član 5.

(Djelatnost Agencije)

Agencija vrši stručne poslove pretežno privrednog karaktera i sa njima povezane upravne poslove utvrđene zakonima i drugim propisima, koji se odnose na privatizaciju i koordinaciju poslova u oblasti Javno-privatnog partnerstva.

Član 6.

(Nadležnost u oblasti privatizacije)

U okviru svoje djelatnosti u oblasti privatizacije Agencija vrši:

- a) organizovanje i podsticanje privatizacije privrednih subjekata na području Kantona;
- b) odobravanje početnog bilansa privrednih subjekata u skladu sa metodologijom za pripremu privrednih subjekata za privatizaciju;
- c) određivanje, provođenje, organizovanje i nadziranje privatizacije privrednih subjekata na području Kantona iz svoje nadležnosti;
- d) zaključivanje ugovora o privatizaciji privrednih subjekata putem prodaje privrednih subjekata, leasinga i drugih metoda;
- e) organizovanje i podsticanje obrazovanja i stručnog usavršavanja u oblasti privatizacije;
- f) pružanje savjetodavne pomoći privrednim subjektima na području Kantona u oblasti privatizacije;
- g) organizovanje i provođenje informativno-promotivnih djelatnosti u oblasti privatizacije;
- h) obavlja i druge poslove u vezi sa privatizacijom, utvrđene zakonom i drugim propisima i odlukama Vlade Kantona.

Član 7.

(Nadležnost u oblasti javno privatnog partnerstva)

U okviru svoje djelatnosti iz oblasti Javno-privatnog partnerstva (u daljem tekstu JPP) Agencija obavlja sljedeće poslove:

- a) priprema i podnosi Vladi Kantona godišnji plan aktivnosti i godišnji izvještaj o provođenju Zakona o javno privatnom partnerstvu Srednjobosanskog kantona.
- b) uspostavlja i vodi Registar ugovora o javno- privatnom partnerstvu te osigurava da Registar bude javno dostupan;
- c) priprema te daje stručna mišljenja o pojedinim pitanjima iz ovoga Zakona i propisa donesenih na osnovu Zakona o JPP;
- d) prati postupak izrade te pruža stručnu podršku u postupku izrade trogodišnjih i godišnjih planova iz Zakona o JPP-u;
- e) na godišnjoj razini priprema i objavljuje zbirni pregled potencijalnih projektnih ideja JPP-a (Katalog potencijalnih projekata javno-privatnog partnerstva Srednjobosanskog kantona);
- f) daje mišljenje o osnovanosti inicijativa za izmjene i dopune Zakona o JPP-u, te drugih propisa o JPP-u;

- g) u suradnji s drugim mjerodavnim tijelima organizira specijalističke programe edukacije za javna tijela i druge učesnike;
- h) surađuje sa naučnim i istraživačkim institucijama, socijalnim partnerima, privrednim i nevladinim udruženjima i drugim zainteresiranim stranama u svrhu unapređenja primjene Zakona o JPP-u;
- i) vrši promociju i izučava primjenu najbolje prakse JPP-a te, u svojoj domeni, surađuje s domaćim i inozemnim javnim tijelima i međunarodnim organizacijama i institucijama ovlaštenim za JPP, u skladu sa zakonom.

DIO TREĆI

III. UPRAVNO RJEŠAVANJE I UPRAVNI NADZOR

Član 8.

(Upravno rješavanje u oblasti privatizacije i zaključivanje ugovora)

- (1) Agencija, u okviru svoje nadležnosti u oblasti privatizacije, donosi pojedinačne upravne akte, na osnovu materijalnog propisa, a u skladu sa zakonom koji reguliše upravni postupak.
- (2) U okviru ovlaštenja utvrđenih zakonom i drugim propisima, Agencija u postupku privatizacije zaključuje ugovore i posreduje u zaključivanju ugovora.

Član 9.

(Upravni nadzor)

- (1) Po žalbama na prvostepena rješenja Agencije, donesena u upravnom postupku u oblasti privatizacije, rješavaju ministarstva Kantona, svako u okviru svoje nadležnosti.
- (2) Inspekcijски nadzor vrše Kantonalna ministarstva iz svoje nadležnosti.

DIO ČETVRTI

IV SARADNJA SA DRUGIM ORGANIMA I INSTITUCIJAMA

Član 10.

(Saradnja sa drugim organima i institucijama)

U okviru svoje djelatnosti Agencija surađuje sa organima Bosne i Hercegovine, Federacije Bosne i Hercegovine, organima uprave Kantona i drugih kantona u Federaciji Bosne i Hercegovine, općinskim organima uprave u Kantonu, međunarodnim institucijama i organizacijama u skladu sa uputama Vlade Kantona.

Član 11.

(Obaveza dostave informacija i pružanja podrške)

Sva ministarstva i organi uprave u Kantonu, niži nivoi jedinica lokalne samouprave, kao i privredna društva kojima upravlja ili u čijem upravljanju učestvuje Kanton po osnovu državnog kapitala, dužni su dostavljati sve informacije i pružati svu podršku koja je potrebna Agenciji za realizaciju aktivnosti iz člana 5., 6. i 7. ovog zakona.

DIO PETI

V. UPRAVLJANJE I RUKOVOĐENJE AGENCIJOM

Član 12.

(Organi Agencije)

Organi Agencije su Upravni odbor, direktor i izvršni direktor za finansije.

Član 13.

(Sastav Upravnog odbora i odgovornost za rad)

- (1) Agencijom upravlja Upravni odbor.
- (2) Upravni odbor se sastoji od predsjednika i četiri člana, od kojih je jedan član ispred resornog ministarstva, a koje nakon provedenog javnog poziva imenuje Vlada Kantona na prijedlog resornog ministarstva na period od četiri godine.
- (3) Na prijedlog resornog Ministarstva Vlada Srednjobosanskog kantona će u roku od mjesec dana od stupanja na snagu ovog zakona imenovati privremeni upravni odbor.
- (4) Upravni odbor za svoj rad odgovoran je Vladi Kantona.

Član 14.

(Nadležnosti Upravnog odbora)

Upravni odbor Agencije:

- a) vrši nadzor nad zakonitošću rada i finansijskim poslovanjem Agencije;
- b) donosi Statut Agencije, uz saglasnost Vlade Kantona;
- c) donosi Poslovnik o svom radu;
- d) donosi druge opće akte Agencije na prijedlog direktora, izuzev Pravilnika o radu;
- e) usvaja finansijski plan i program rada Agencije na prijedlog direktora;
- f) usvaja završni račun i izvještaj o radu Agencije;
- g) vrši i druge poslove u skladu sa zakonom i Statutom Agencije.

Član 15.

(Direktor i izvršni direktor za finansije)

- (1) Agencijom rukovode direktor i izvršni direktor za finansije koji mijenja direktora u odsutnosti.
- (2) Procedura za izbor direktora i izvršnog direktora za finansije provodi se putem javnog oglasa.
- (3) Na prijedlog resornog ministarstva direktora i izvršnog direktora za finansije imenuje i razrješava Vlada Kantona, na period od četiri godine i mogu biti ponovo imenovan na još jedan mandat.

Član 16.

(Nadležnosti direktora i izvršnog direktora za finansije)

- (1) Direktor i izvršni direktor za finansije organizuju, koordiniraju i rukovode izvršenje poslova u Agenciji.
- (2) Direktor i izvršni direktor za finansije u svom radu:
 - a) rukovode Agencijom;
 - b) predstavljaju i zastupaju Agenciju;
 - c) odgovaraju za zakonitost rada, pravilno i zakonito vođenje materijalno-finansijskog poslovanja Agencije;
 - d) donose Pravilnik o radu;
 - e) odlučuju o zapošljavanju i raspoređivanju radnika Agencije;
 - f) donose pojedinačne pravne akte iz nadležnosti Agencije;
 - g) provode odluke, zaključke, upute i druge akte Vlade Kantona i Upravnog odbora Agencije;
 - h) obavljaju i druge poslove utvrđene zakonom, Statutom i drugim općim aktima Agencije.

Član 17.

(Statut)

Statutom Agencije uređuje se naročito:

- a) organizacija i način poslovanja Agencije;
- b) upravljanje, nadzor i rukovođenje Agencijom;
- c) zastupanje i predstavljanje Agencije;
- d) druga pitanja u vezi sa poslovanjem Agencije.

DIO ŠESTI

VI. FINANSIRANJE AGENCIJE

Član 18.

(Finansiranje Agencije)

Sredstva za rad Agencije osiguravaju se u Budžetu Kantona, donacijama domaćih i međunarodnih organizacija i iz drugih izvora.

Član 19.

(Finansijsko poslovanje)

- (1) Finansijsko poslovanje Agencije vrši se u skladu sa propisima koji regulišu budžetsko poslovanje.
- (2) Raspodjela prihoda koje Agencija ostvari po osnovu obavljanja poslova iz svoje nadležnosti vrši se na osnovu odluke Vlade Kantona.

DIO SEDMI

VII. PRELAZNE I ZAVRŠNE ODREDBE

Član 20.

(Prestanak rada Kantonalne agencije za privatizaciju)

Agencija za privatizaciju u Srednjobosanskom kantonu prestaje sa radom danom početka rada Agencije.

Član 21.

(Rok za imenovanje direktora i izvršnog direktora za finansije)

- (1) Na prijedlog resornog Ministarstva Vlada Srednjobosanskog kantona će u roku od mjesec dana od stupanja na snagu ovog zakona imenovati vršioca dužnosti direktora i izvršnog direktora za finansije na period od tri mjeseca, odnosno do okončanja postupka imenovanja.

Član 22.

(Statut i opći akti)

- (1) Upravni odbor Agencije će donijeti Statut uz saglasnost Vlade Kantona u roku od 15 dana od dana njegovog imenovanja.
- (2) Upravni odbor Agencije će donijeti Pravilnik o unutrašnjoj organizaciji i druge opće akte Agencije u roku od 30 dana od dana donošenja Statuta.

Član 23.

(Rok za imenovanje Upravnog odbora)

- (1) Na prijedlog resornog Ministarstva Vlada Srednjobosanskog kantona će u roku od mjesec dana od stupanja na snagu ovog zakona imenovati privremeni upravni odbor.
- (2) Privremeni upravni odbor imenuje se na period od tri mjeseca, odnosno do okončanja postupka imenovanja Upravnog odbora.

Član 24.

(Prestanak mandata)

Mandat direktora, Upravnog odbora i Nadzornog odbora Agencije za privatizaciju u Srednjobosanskom kantonu prestaje sa danom prestanka rada Agencije za privatizaciju Srednjobosanskog kantona.

Član 25.

(Preuzimanje zaposlenika)

Danom početka rada Agencija preuzima zaposlenike koji se zateknu na radu u Agenciji za privatizaciju u Srednjobosanskom kantonu do dana njenog prestanka rada.

Član 26.

(Preuzimanje poslova, opreme, sredstava za rad, arhive, akata, predmeta i druge dokumentacije)

Danom početka rada Agencija preuzima poslove, opremu, sredstva za rad, arhivu, akte, predmete i drugu dokumentaciju kao i druga prava i obaveze Agencije za privatizaciju u Srednjobosanskom kantonu, čiji je pravni sljednik.

Član 27.

(Prestanak važenja ranijeg propisa)

Danom stupanja na snagu ovog zakona prestaje da važi "Zakon o Agenciji za privatizaciju (Službene novine Srednjobosanskog kantona)", broj: 4/97, 7/05 i 10/12).

Član 28.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Srednjobosanskog kantona".

Broj:

PREDSJEDAVAJUĆI SKUPŠTINE

Travnik,

Dražen Matišić

OBRAZLOŽENJE

I. USTAVNA OSNOVA

Ustavna osnova za donošenje Zakona sadržan je u članu 32a. stav (1) tačka j), a u vezi sa članom 41. tačka c) Ustava Srednjobosanskog kantona ("Službene novine Srednjobosanskog kantona", broj: 1/97, 5/97, 6/97, 2/98, 7/98 – ispravka teksta, 8/98, 10/2000, 8/03, 2/04 i 14/04).

II – RAZLOZI ZA DONOŠENJE

Razlog za donošenje Zakona o agenciji za privatizaciju i javno privatno partnerstvo je pripajanje Javno privatnog partnerstva Agenciji za privatizaciju kojim će Agencija za privatizaciju i javno privatno partnerstvo postati pravni sljednik Agencije za privatizaciju i preuzeti njene nadležnosti, te omogućiti potencijalnim domaćim i stranim investitorima sve informacije vezane za poslovno okruženje, konkurentne prednosti i investicione mogućnosti u Knatonu.

III – PROVEDBENI MEHANIZMI I NAČIN OSIGURANJA PROVEDBE

Rješenja sadržana u prijedlogu Zakona o agenciji za privatizaciju i javno privatnom partnerstvu Srednjobosanskog kantona imaju za cilj uspostavu zvanične Agencije koja će buduće investitore povezati s institucijama vlasti, javne uprave i svih dugih institucija koje su dijelom procesa prilikom realizacije investicije, a što će utjecati i na poboljšanje ugleda Kantona kod potencijalnih investitora, kako domaćih, tako i stranih. Glavni cilj je stvaranje poslovnog ambijenta, te dovođenje kvalitetne investicije koja će otvoriti nova radna mjesta, te recipročno tome i utjecati na cjelokupan rast standarda života.

Danom stupanja na snagu Zakona o agenciji za privatizaciju i javno privatnom partnerstvu Ministarstvo privrede pokrenut će proceduru za izmjene Zakona o Javno-privatnom partnerstvu ("Službene novine Srednjobosanskog kantona" broj:3/18) i Uredbe o identifikaciji, pripremi, ugovaranju i praćenju implementacije projekta Javno-privatnog partnerstva („ Službene novine Srednjobosanskog kantona “ broj: 7/18).

IV - EKONOMSKA OPRAVDANOST DONOŠENJA PROPISA

Implementacija predloženih zakonskih rješenja je preduslov za stvaranje adekvatnog poslovnog ambijenta u kome će doći do otvaranja novih, konkurentnijih radnih mjesta i povezivanja investitora sa institucijama vlasti, javne uprave i svih drugih institucija.

V – FINANSIJSKA SREDSTVA ZA PROVOĐENJE PROPISA

Za provođenje ovog zakona nije potrebno osigurati dodatna sredstva iz Budžeta Srednjobosanskog kantona.

VI- PREGLED I SADRŽAJ PROPISA

Član 1. definiše osnivanje Agencije za privatizaciju i Javno-privatno partnerstvo.

Član 2. definira pravni položaj Agencije.

Član 3. definiše sjedište Agencije.

- Član 4.** definiše početak rada Agencije.
- Član 5.** reguliše djelatnost Agencije.
- Član 6.** definiše nadležnost u oblasti privatizacije
- Član 7.** definiše nadležnost u oblasti JPP-a.
- Član 8.** definiše upravno rješavanje u oblasti privatizacije i zaključivanje ugovora.
- Član 9.** definiše upravni nadzor.
- Član 10.** definiše saradnju Agencije sa drugim organima i institucijama.
- Član 11.** definiše obavezu dostave informacija i pružanja podrške Agenciji.
- Član 12.** definiše organe Agencije.
- Član 13.** definiše sastav upravnog odbora i odgovornost za rad.
- Član 14.** definiše nadležnost upravnog odbora.
- Član 15.** definiše rukovođenje Agencijom.
- Član 16.** definiše nadležnost direktora i izvršnog direktora Agencije.
- Član 17.** definiše statut Agencije.
- Član 18.** definiše finansiranje Agencije.
- Član 19.** definiše finansijsko poslovanje.
- Član 20.** definiše prestanak rada Kantonalne Agencije za privatizaciju.
- Član 21.** definiše rok za imenovanje direktora i izvršnog direktora za finansije.
- Član 22.** definiše statut i opće akte.
- Član 23.** definiše rok za imenovanje Upravnog odbora.
- Član 24.** definiše prestanak mandata direktora, upravnog i nadzornog odbora Agencije za privatizaciju.
- Član 25.** definiše preuzimanje zaposlenika koji se zateknu na radu u Agenciji za privatizaciju.
- Član 26.** definiše preuzimanje poslova, opreme, sredstava za rad, arhive, akata, predmeta i druge dokumentacije.
- Član 27.** definiše Prestanak važenja ranijeg propisa.
- Član 28.** definiše stupanje na snagu.